

## Bescherung 1954

„D'Bescherung wird heia fotografiert!“  
hot si da Voda echauffiert.

“Weu, mir wö'n's jo onschau'n späta.  
Iwa Christbambüda g'freit si jeda.“

An App'rat, den hot a g'hobt,  
der funktioniert, des wor erprobt.  
In da Sunn' d'Kina om Nomitto,  
de büd'lt da App'rat wundabor o.

Weu z'Veihnocht'n d'Sunn z'boid untageht,  
gibt's zur Bescherung koa Tagesliacht net.  
Beschert wird drin' und bei da Nocht,  
wonn de Sunn' koan Stich mehr mocht.

„A Blitzliacht hot mee App'rat no net“  
denkt si da Voda, „des is bled.“  
Do foit eam ee: „G'les'n hob' i wo,  
a Magnesiastang'l tuit's grad' aso.“

Endli d'Bescherung donn auf d'Nocht,  
long hätt'n's d'Buim eh nimma g'mocht.  
Dass's aufg'regt wor'n is zum Vosteh,  
g'sponnt wor'n's, g'rod' bibat hob'm de zwee.

Is Gleckal leit't, da Bam sche brennt,  
d' Sternspritza spritz'n, wia ma's kennt.  
Untan Bam 's Krippal, a poor G'schenka.  
De Buim' dalest, des kost da denga.

Noch Evangelium und Stülle Nocht,  
glei hob'm sa si iwa d'Gschenka g'mocht.  
Do schreit da Voda „No net, es Beng'l  
z'erscht no a Foto, wort's a Wengl!“

A Magnesiastang'l og'heft' om Bes'nstü  
da Voda Bam und Famüli obüd'In wü.  
D'Muida in d'Mitt'n g'setzt, d'Buim' g'stöt daneb'm,  
's Foto soi jo ausschau'n wia's richtige Leb'm.

„Ruiwi so bleib'm und jo nimma rihr'n,  
weu jetzt muiss i eng fotografier'n!“  
Blend'n auf, 's Stang'l on'zund'n glei.  
A kurza Blitz, 's stinkt, und ois is vobei.

Zwoa Büda moch a — zur Sicherheit — no.  
G'scheg'g'n is's, de Buima de spü'n si scho.  
D'Muida moat: „Veihnocht'n, is wirkli sche,  
und de Büda, de wer'n uns a Odenga see.“

Vierzehnto d'rauf wor'n de Būda donn do:  
's erschte ganz schworz, des mocht neam froh.  
Vowog'lt is ona — oiso ziemli defekt  
Owa 's dritte Foto, des wor fost perfekt!

Nur wo'ma's owa onschaut gonz g'nau,  
donn wor'n ob'm om Būdronnd, de Kepf nimma d'ro!  
**So** wor unsa Weihnocht'n dokumentiert,  
onascht wia heet, wo ois og'fülm't glei wird!

*Advent 2024*